



150 Joor ITALIA e Commedia

Me het's scho gsee in dr Antygge
as Grieche, Reemer andersch tiggte:
Wil d Grieche als nur debattiere
und sich im Stadion duelliere;
d Reemer anstatt z kämpfe prasse
leere sich die volle Kasse.
Und doo d Germane nooni maane
längt's: **D Konsequänz**
vo Dekadänz isch Insolvänz.

Und wil jetz schnäll A-Post-el lande
isch Rom no drey Daag ufferstande.
Gschiifleti Pater renne-n-umme,
verkinde: „S Gottesrych de Dumme!“
Dr Chef vor donna syg dr uomo,
und s Gotteshuus em Bapscht sy Duomo.
Doch au dr Klerus erläbt e Keeruus.

Vor 150 Joor isch's gsii,
Italie wird Demokratie.

Doch s Schiggsaal het sich widerhoolt,
dr Deyfel d Volggsrächt bald scho ghoolt.
Bewaffneti Pate schlyyche-n-umme
verkinde: „S Lääbe koscht ab jetz e Summe.“

Drotz mani pulite wird manipuliert,
denunziert und kopuliert ganz ungeniert -
wän intressiert wo's aanefiert?

Statt Sodom und Gomorra
herrscht Saddam und Camorra.

Halt! mir wänn nimmi grytsiere,
hänn Angscht, wänn s Lääbe nit risgiere.
Mer saage lieber allegorisch,
was kaine sait obwool es woor isch:

Versione Binggis: dr PINOCCHIO e Commedia dell'Arte

Dr Papa Razzi sait mit Stolz:
Ych han e Soon (zwoor ain uus Holz!)
Doch dä folgt nyt, mit Fuchs und Kater
schwänzt är d Schuel fir ins Theater.
S git Aggrobate, und zem Lache
E Fink wo ka-n-e Schwalbe mache.
Noochhär haisst's denn: Ab in d Wält!
Si sueche nooch-em **Wunderfäld**
wo wild wurd waggse alles Gäld -
wie friener uff de Schwyzer Bangge,
bivoor „s Ghaimnis“ het aafoo wange.

D Insle vo de-n-Aarbets Biine
isch voll Stress, das isch zem gryyne,
denn lieber bitzli ummehogge,
im **Spiiland** game, chille, zogge.
Doch jetz folgt, zer Zucht vor Juuged,
e Leggzion in Dytscher Tuuged:
Die fuule Teenies mien in Stolle,
oder geen im Meer verscholle.
Deert schluggt und rettet so die Aaarme
dr Walfisch Merkel voll Erbaarme,
schwimmt zem Land und spuggt si uuse,
uff e Camping z Lampedusa.

Versione Bunga: Dr BERLUSCONI e cumMEDIA divina

Dr Dante het dr Wääg in d Hell besunge,
em Cavaliere isch er läbtigs glunge:
Het bschysse, gmuggd, het ghuert und glooge,
het stroofrey alli Gsetz verbooge;
mit Forza Italia, Lega Mord,
kontrolliert är Bild und Wort.
Statt z versuure in prigione
Po-Tänz-erinne, oobe-n-oone.

Alli sinn glyych, doch yych bi glyycher
lir hänn rächt, doch yych bi ryycher.

Dur e Fluss vom Vergässe, em Lethe
bringt är sy ganzi Schwarzgäld-Knete,
sini Piccata alla milanese,
zem grosse-n-inkasso in d UBS Chiasso.
Statt Glais fir d Neat-Reere z baue,
duet är Pinup-Geere bschaue
(dää Pin-occhio kennt die Stelle
wo vom Liege zimptig schwelle).

Wenn schmiire und salbe
hilft numme no halbe,
d Gryttigg wird nit stiller
denn bruchsch halt e Killer.

Bim Dante het, vo zunderscht unde
e Biesserwääg sich uffegwunde:
liber d Abfallbärg vo Napoli,
und d Lyyche vo Tangentopoli,
pflaschteret mit Nummere-Konti,
gfiert vom Super-Mario Monti,
goot's stotzig duruff, s'goot aim myys,
durs Fäägfyyr zrugg ins Paradyys.

FIFA l'Italia !